

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**OPĆINA CENTAR SARAJEVO**  
Općinski načelnik



Bosnia and Herzegovina  
Federation of Bosnia and Herzegovina  
Canton Sarajevo  
City of Sarajevo  
**CENTAR MUNICIPALITY**  
Municipal Mayor

Босна и Херцеговина  
Федерација Босне и Херцеговине  
Кантон Сарајево  
Град Сарајево  
**ОПШТИНА ЦЕНТАР САРАЈЕВО**  
Општински начелник

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06 i 51/09), člana 25. Statuta Općine Centar Sarajevo-Prečišćeni tekst („Službene novine Kantona Sarajevo“, broj: 23/04), Odluke o izvršavanju Budžeta Općine Centar Sarajevo za 2024. godinu („Službene novine Kantona Sarajevo“, broj: 11/24, 18/24) i člana 8. Pravilnika za dodjelu novčanih poticaja za kupovinu repromaterijala proljetne, jesenje sjetve i voćarskih sadnica, broj: 16-20-124/23 od 03.05.2023. godine, Općinski načelnik objavljuje:

## **JAVNI POZIV**

**za dodjelu novčanih poticaja za kupovinu repromaterijala proljetne, jesenje sjetve i voćarskih sadnica**

### **I**

#### **PREDMET JAVNOG POZIVA**

Predmet Javnog poziva je prikupljanje zahtjeva i finansijska podrška poljoprivrednim proizvođačima koji se bave uzgojem biljne proizvodnje na području Općine Centar Sarajevo.

### **II**

#### **CILJ POZIVA I NAMJENA SREDSTAVA**

Cilj Javnog poziva je realizacija mjera finansijske podrške poljoprivrednim proizvođačima kao i ublažavanje posljedica do kojih je poskupljenje dovelo, a namjena sredstava je podrška očuvanju biljnog fonda na području Općine Centar Sarajevo.

### **III**

#### **PRAVO UČEŠĆA**

Pravo na učešće po Javnom pozivu imaju svi zainteresovani poljoprivredni proizvođači koji ispunjavaju uslove ovog poziva, a koji imaju mjesto prebivališta/ sjedište obrta i obavljaju biljnu proizvodnju na području Općine Centar, te ispunjavaju druge uslove propisane ovim Javnim pozivom.

#### **IV USLOVI ZA DODJELU SREDSTAVA**

Opšti uslovi koje kandidat treba da ispunjava za novčani poticaj:

- 1) da podnosilac zahtjeva – fizičko lice ima stalno prebivalište i bavi se biljnom proizvodnjom na području Općine Centar Sarajevo (po službenoj dužnosti);
- 2) da je vlasnik obrta registrovan za obavljanje poljoprivredne djelatnosti sa sjedištem na području Općine Centar i bavi se biljnom proizvodnjom na području Općine Centar (po službenoj dužnosti);
- 3) da je podnosilac zahtjeva upisan u Registar poljoprivrednih gazdinstava i Registar klijenata, u nadležnoj Službi Općine Centar Sarajevo i da je izvršio ažuriranje podataka u tekućoj godini (po službenoj dužnosti);
- 4) da je podnosilac zahtjeva vlasnik/posjednik zemljišta pogodnog za biljnu proizvodnju na području Općine Centar Sarajevo;
- 5) da podnosilac zahtjeva ima otvoren i aktivan račun u banci.

#### **V SADRŽAJ POTREBNE DOKUMENTACIJE**

Potrebna dokumentacija u originalu ili ovjerenim kopijama i to:

- 1) Popunjen i potpisan prijavni obrazac – zahtjev (potpisan od podnosioca zahtjeva);
- 2) Dokaz o korištenju zemljišta:
  - za repromaterijal proljetne, jesenje sjetve (kopija skice iz katastra za parcelu ili zemljišno knjižni izvadak), a za voćarske sadnice (kopija skice iz katastra za parcelu i zemljišno knjižni izvadak) za zemljište koji nije stariji od 6 mjeseci ili kupoprodajni ugovor sa regulisanim poreskim obavezama uz koji treba priložiti za istu parcelu kopiju skice iz katastra i zemljišno knjižni izvadak;
- 3) Potvrda/obavijest/instrukcije o otvorenom i aktivnom računu u banci, original ili ovjerena kopija za tekuću godinu;
- 4) Original ili ovjerena kopija fiskalnog računa kupovine izvršene do 31.10.2024. godine.

#### **VI FINANSIRANJE PROJEKTA**

- 1) Sredstva za realizaciju projekta obezbjeđena su u Budžetu Općine Centar Sarajevo za 2024. godinu na ekonomskom kodu 615211-3A.
- 2) Fizička lica i žene koja imaju registrovanu poljoprivrednu djelatnost kod nadležne Službe Općine Centar Sarajevo i koja su upisana u RPG i RK ostvaruju 100% iznosa novčanih sredstava, a ostala fizička lica koja su upisana samo u RPG i RK 80% od naznačenog iznosa u Javnom pozivu.
- 3) Korisnik je dužan prilikom aplikacije navesti površinu na kojoj je izvršena sadnja/sjetva.
- 4) Finansijska sredstva će biti dodijeljena na osnovu dostavljenih faktura i/ili fiskalnih računa (original ili ovjerena kopija) na ime poljoprivrednika odnosno obrta o kupovini obavljenoj do 31.10.2024. godine.

Javni poziv obuhvata dodjelu novčanih sredstava, kako slijedi u tabelarnom prikazu:

r/b	Vrsta repromaterijala za proizvodnje u 2024. godini	Iznos u KM (Fizička lica)	Iznos u KM (Obrti i žene)
1.	Proljetna sjetva	do 480	do 600
2.	Jesenja sjetva	do 480	do 600
3.	Voćarske sadnice	do 480	do 600

Podnosilac zahtjeva prilikom predaje zahtjeva može ostvariti novčani poticaj **za sve** vrste proizvodnje, prateći gore navedene norme.

Prijavni obrazac možete preuzeti na sljedećem linku:

<http://www.centar.ba/stranica/javni-pozivi-euprava>

## VII NAČIN I ROK ZA PODNOŠENJE ZAHTJEVA

Rok za prijavu na Javni poziv je 7 dana od dana objavljivanja u dnevnom listu, web stranici, oglasnoj ploči Općine Centar Sarajevo i oglasnim pločama mjesnih zajednica na kojima se obavlja biljna proizvodnja.

Popunjeni zahtjevi sa potrebnom dokumentacijom se podnose u zatvorenoj koverti na protokol Općine Centar Sarajevo ili preporučeno putem Pošte na adresu:

Općina Centar Sarajevo  
Mis Irbina 1  
71000 Sarajevo  
Sa naznakom „Javni poziv za dodjelu novčanih poticaja za kupovinu repromaterijala za proljetnu, jesenju sjetvu i voćarske sadnice“  
**„NE OTVARAJ“**

Na poledini koverta obavezno se navodi: ime i prezime podnosioca zahtjeva, adresa i kontakt telefon.

Neblagovremeni i nepotpuni zahtjevi/prijave neće biti razmatrane.

Korisnici koji su izvršili aplikaciju, a nisu ostvarili pravo na poticaj, imaju pravo na prigovor u roku od 8 dana od dana objavljivanja preliminarne liste na web stranici Općine Centar, po kojem rješava Općinski načelnik putem nadležne Službe.

## VIII OSTALE ODREDBE

Općina Centar Sarajevo ne snosi nikakve troškove u postupku prikupljanja i podnošenja prijave na Javni poziv. Općina Centar Sarajevo ne snosi odgovornost prema učesnicima Javnog poziva u pogledu aktivnosti koje su preuzeli u cilju apliciranja.

Prispjela dokumentacija se ne vraća podnosiocu.

Sve dodatne informacije u vezi Javnog poziva mogu se dobiti na tel. 033/562-512.

**Općinski načelnik**  
Srđan Mandić s.r.